



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las sequaintas fatschendas:

Plan da quartier Stradun-Hotel Belvédère-Döss

I'l rom da l'elavuraziun dals recuors sun gnüts fats divers müdamaints, impustüt per quai chi riguarda la reducziun da l'otezza dal stabilimaint nouv e las plazzas da parcar d'ün cunfinant.

Plan da quartier Clozza

Il cussagl cumünal prevezza d'introdüer la procedura dal plan da quartier pel territori da Clozza, quai davo chi'd es entrada la dumonda davart dals proprietaris d'üna parcella. El ha decis da publichar quist'intenziun tenor las disposiziuns legalas chantunales (cun pussibilità da recuorrer). Il PQ Clozza dess reglar l'avertüra, impustüt il parkegi e la fuormaziun, ed amegldrar a lunga vista eir la situaziun pels peduns aint il stret da Clozza.

Chanalizaziun Porta

Pervia dals differents novs fabricats giò'n Porta sto gnir adattada resp. spostada la chanalizaziun. Previssa es üna sanaziun cumpletta infra ils prossems trais ons, cun aua, chanalizaziun, forza electrica e scha pussibel eir cabels da la Swisscom.

GEP S-charl

Il cussagl cumünal ha approvà il plan general da l'allontanamaint da l'aua (Genereller Entwässerungsplan GEP) per S-charl a man da l'Uffizi chantunal per natüra ed ambiaint (ANU). Il GEP cumpiglia eir il lö da la sarinera ed ün uschèdit "Rückstaukanal".

Tualettas publicas aint in S-charl

Tualettas publicas aint in S-charl vegnan giavüschadas da differentas varts, quai eir pervi da la Senda da l'uors chi vain inaugurada als 27 gün. Il lö es previs pro la nouva sarinera. Il cussagl ha decis da scriver oura las lavuors correspundentas insembel cul fabricat da la sarinera, ils cuosts vegnan o suottamiss ad üna radunanza cumünala o tuts aint il preventiv 2011, tuot tenor cura cha las lavuors vegnan realisadas.

Funtana Lischana

Pella fontana da Lischana es d'installar ün indriz per extrar l'arsen da l'aua minerala. Il cumün sto cumprar per quist scopo, ma eir per far üna correctura necessaria daspö lönch, ün toc terrain d'ün proprietari privat. Il cussagl ha approvà il contrat correspondent.

Deponia Üschplans

Il cussagl ha approvà las cundiziuns pel contrat cul proprietari dal terrain ingio cha la deponia per material da s-chav es previssa. Uossa po il cussagl lantschar la procedura da fabrica dadour la zona.

Concept da pasculaziun

Ün concept da pasculaziun ha blers avantags per l'agricultura e pel cumün insomma. Ils paur da Scuol han decis cha quist concept dess gnir elavurà. Il cussagl cumünal ha surdat l'incumbenza al büro ARINAS environment AG da Zernez. La gronda part dals cuosts surpiglia il Chantun (ANU), pel cumün resta ün import da ca. CHF 3'500.-- chi vain pajà our dal fondo "Agricoltura in avegnir".

Lavuraint social da scoula

Il cumün resp. ils cumüns bsögnaran cul temp ün lavuraint social pella scoula sco cha quai exista fingià in divers oters lös. La listessa persuna pudess eir manar ün lö d'inscunter per giuvenils fin 16, eventualmaing 18 ons. Sco prüm pass vain scleri scha'ls cumüns intuorn Scuol o amo meglder tuot la regiun vögljan as participar vi da l'elavuraziun d'ün concept per üna tala piazza. Il resultat dal concept dess esser quel chi's vezza plü cler cun che pensums e da che cuosts chi'd es da far quint.

Tempo 60 sülla via da dis-charg

Cuntschaintamaing ha il Chantun refüsà fingià ün pêr jadas üna limitaziun da sveltezza sülla via da dis-charg. Uossa chi s'ha fat diversas noschas experienzas ha decis il cussagl da tour per mans darcheu la chosa e da render attent als respunsabels dal Chantun chi fa propcha dabsögn da limitar la sveltezza sün 60 km/h e surtuot da relaschar ün scumond da surpassar in vicinanza da las entradas sülla via da dis-charg.

Stradun

Il cussagl ha discus, insembel culla cumischiun da trafic, differents progets pel Stradun e trat las seguaintas decisziuns:

Zona d'inscunter

Culla zona d'inscunter sül Stradun cun tempo 20 e priorità dals peduns esa intant da spettar. Avant co far ulteriurs pass dess gnir consolidada la situaziun actuala cun tempo 30. Las lavuors da sanaziun chi sun previssas i'ls prossems ons vegnan però fattas da möd cha l'introducziun d'üna zona d'inscunter nu vain periclitada.

Isla sül Stradun

L'isla davant l'entrada principala dal BES vain allontanada. Las sriblas pels peduns vegnan però mantgnüdas.

Cruschada @-Center fin hotel Belvédère

Per augmentar la sgürezza e s-chaffir üna situaziun plü clera pels automobilists faja dabsögn da fabricar oura la cruschada pro l'@-Center. Il cussagl cumünal ha discus differents variantas e preferischa uossa quella da far la storta plü gronda vers nord. In quist connex sun da levar piazzas da parcar, i füss però pussibel da realisar piazzas per cars, là ingio chi's rechattan actualmaing piazzas per autos.

La cumischiun da trafic es plünavant landervia da stübgjar propostas per ün concept da parcar, cumprais ün sistem d'inviaziun ed ün reglamaint da taxas (eir taxas pella mansteranza).

Fundaziun Monreal

La Fundaziun Monreal vinda la Villa Monreal a la GWAES (Geschützte Werkstätten Engadin und Südtäler). Il cussagl cumünal ha decis da suottascriver üna decleranza d'esser d'accord cul dret da recumprita. Al listess mumaint ha'l approvà il contrat a reg. acquist da terrain gratuit per realisar tenor bsögn ün marchapè lung la via da la staziun.

Zonas da quietezza

Il cussagl cumünal ha institui üna cumischiun pellas zonas da quietezza. Ella as cumpuona da las seguaintas personas resp. organisaziuns: cussagl cumünal (Marco Müller), ESTAG (rapreschantand eir l'ir cun gianellas, Outdoor Engiadina, il bain San Jon e'ls hoteliers), gestiun forestala da Scuol, società da chatschaders, guardgia sulvaschina, ün manader da gitas, ün dals hoteliers da S-charl e las Pendicularas.

Surdattas da lavuors

Chanalizaziun Porta

Lavuors d'indschegnars: Canclini & Peer S.c.r.l., Scuol

Stradun, traget Gallaria Milo - @center

Lavuors da surtratta: ARGE Engiadina Bassa (Hew/Palatini)

Chasa Central

Installaziuns electricas generalas: IES/Electra Buin, Scuol

Installaziuns electricas Spitex/Canorta: IES/Electra Buin, Scuol

S-chodamaint: Guido Christoffel, Scuol

Installaziuns sanitarias: Stecher SA, Scuol

Chanalizaziun Pradella / Sarinera Sotruinas

Puntinadas specialas (punt da passlung): Lawil Gerüste AG, Tusan

Furniziun ed installaziun da las pumpas: Häny AG, Jona

Via da la Staziun

Impressari: Mario GmbH, Scuol

Surtratta da catram: Implenja Bau AG, Zernez

Dumondas da fabrica

Il cussagl resp. la direcziun han dat ils seguaints permiss da fabrica:

- Martin + Madlaina Schloeth: ingrondimaint da la chasa d'abitar in Crastuoglia Sura
- Barbara + Armin Portmann-Fried: restructuraziuns e renovaziuns da la chasa in Porta
- Rosaria + Jürg Arquint: chasa d'abitar in Porta
- Iertavels Jon Schmidt: ingrondimaint da la chasa d'abitar in Crastuoglia sco eir per sondas geotermicas e diversas lavuors plü pitschnas.